

Papru

KURUSENMAYA SHUARAN

papí akuptukma

Kurusenmaya Yus-shuaran Papru áatramiania nu

1 ¹Wi Pápruitjai. Yus wakerutak Jesukrístunun etserkat tusa akatra akupkamuitjai. Wisha ii yachi Timiutéujai ²ju papí áarar nuí Kuruse péprunam Kristu péñker umirkarum Yusna ajasuitrumna nu akuptaji. Yus ii Aparí atumin wáitnentaimturma asa yainmakarti imiatkinchanum tuke shiir pujustinian.

Papru Yus-shuaran Yúsan áujtusmianis nu

³Iisha atumin Yus áujtakur ii Uuntrí Jesukrístu Aparí Yus ashí tsawant yúmiñkijai. ⁴Atumsha Jesukrístu ti shiir enentáimtamusha tura ashí Yus-shuar aneamusha antukji. ⁵Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatatí tusarum nákarne. ⁶Nu chicham ashí nunkanam pampaakui shuara enentáin nereá áinis nusháa ajarar yamaikia péñker túrin áiniawai. Núnisan atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai. ⁷Nu chichaman Épapas ujatmakmarme. Niisha iijjai métek takasu asamtai ti aneamuiti. Atumniasha Kristu takatrin ti shiir takartamsaiti. ⁸Niisha átum Yus-shuar asarum mai anenai ajamun ujatmakmaji.

⁹Iisha nu antukar Yus ashí tsawant áujtajrume. Yus ni wakeramun ti paant nekaprutmawarat tusar seaji. Ashí Yúsnan ni enentáimtairijjai ashí Níiniun paant nekaatniun Yus jintinramat tusar seaji.

¹⁰Atumsha Krístunu ainia núnisrum péñker túrutak tusar seaji. Tura ashí ni wakerana nu umiakrum ashí péñker ana nu, nerektinia áintsarmek, túrattarme. Núnis túrarum Yus unuimiatki wéakrum

Nin ti penker nekaak tusar seaji. ¹¹Yus ti kakaram asa ikiantamprat tusar seaji. Nujaj ashí itiurchat ákuisha páchitsuk ti shiir warasrum katsuntrattarme. ¹²Yus ni shuarin tsáapnia nuj ashí péñkeran susattawai. Tura incha nuj pachiinkiatniun tsan_katramka asakrin Yus Apa yuminsamniaitrome. ¹³Yus iwianchin nupetak íwianch akupeana nú kiritniunmaya uwemtikramar ni aneamu Uchirí akupeana nuj wearmakmaji. ¹⁴Ni Uchirí krúsnum jaka ii tunaarín nijiar tsan_kurtamar uwemtikrampramaji.

Kristu jakamujaj Yusjaj nawamnaikiar shiir pujustin

¹⁵Yus wáinkiachminiaitiat ni Uchirí akiiniamai tura ayashimkiamiyai. Túmaitiat ashí najanamua nuna yaunchu pujú asa ashí akupniuiti. ¹⁶Niijjaj Yus ashí nayaimpiniam írunna nunasha nun_ká írunna nunasha, ashí wáiniaj nunasha núnisan wáintsuj nunasha mashi najanamiyai. Nu arantcha ashí akupin ju nunkanam írunna nusha, nayaimpiniam írunna nusha, iwianchnium írunna nusha, ashí Niijjaj najanamu ániak Nin umirkarti tusa najanamu ániawai. ¹⁷Ashí najanamua nuna yaunchu, Krístuka tuke pjuwiti. Ashí najanamu írunna nuna emestsuk wáinniuiti. ¹⁸Ashí Yus-shuar métekrak chikichik ayashtinia áinis enentáimkiumka nuna muuke Krístuuiti. Tura nu ayashín ni iwiaakmarijjaj iwiaaku átinian súsaiti. Niisha ashí jakamunmaya nantakniujaj imiá nan_kaamantuiti. Nújajinkia ashí enentáimpramnia írunna nunasha akupniuiti. ¹⁹Yus ashí takamtsuk Kristuj shiir pujumiyai. ²⁰Núnisan Yus Kristu krúsnum jakamujaj ashí nayaimpinmasha tura ju nunkanmasha írunna nuna Niijjaj nawamnaikiar shiir pujusarat tusa wakerukmiyai.

²¹⁻²²Atumsha nuik tunáa túrin asarum atumí enentáin Yusa nemasri ámarme. Tuma asarum yajá wekaimiarne. Antsu Kristu, aentsu ayashín ayashimiak, krúsnum wáitias jakamujaj ii tunaari asakármatai yamaikia Yusjaj nawamnaikiar shiir pujaji. Nujaj Kristu in péñker ajasuncha tunaan máatrachmancha tura sumamachuncha Yúsaj ejetamatjaj. ²³Tuma asamtai Jesukrístu shiir enentáimtusrum kakaram ajasrum katsuartiniaitrome. Tura uwempratin chicham antukuitrum nuyá kanakchatniuitrome. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴Atumin wáitiaknasha ti shiir waraajaj. Kristu ni shuarin nekas péñker awajsat tusa wáitiana nuj pachiinkia asan waraajaj. Ashí Yus-shuar Kristu ayashí áintsan ániakui Yus-shuaran yáintajtsan ayashrujaj wáitiakun shiir enentáimjai. ²⁵Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáintrintjai. ²⁶Yámankamtaiknumia nekaachman

Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti. ²⁷Nu chichamsha júiti: Kristu atumí enentáin pujak Nijjiaí métek ti shíram awajtamsattawai. Nu imiá shiir chichamnum Israer-shuarchasha pachiiniainian Yus ashí ni shuari nekawaarat tusa wakerimiayi.

²⁸Iisha Kristu étsereaji. Túrar ashí enentáimtikrar péñker nekaawarat tusar jintintiainiaji. Nujai Krístujai tsanin̄kiar ashí péñker tsakarartatui. ²⁹Tuma asantai Kristu ni kakarmarin̄ tí surakui nekas kakaram takaajai.

2 ¹Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmaya shuarnasha, tura ashí winia waitcha ainia nunasha yáintaj tusan ti takaitjai. ²Ashí shiir enentáimtikratnium ti takaajai. Núnisan aneniarum chikichik enentáijjiaí métekrak wekasatarum tusan wakerajrume. Nu arantcha, ashí Yusna ti péñker nekaarum tuke katsuaruk tusan takaajai. Nujai Kristu ti péñker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíraitai. ³Tura kakaram ajasam Kristu péñker nekaam ashí shiir enentáimpramnia nusha tura ashí Yusna nekaamnia nusha nekaattarme. ⁴Atumin chíkich shuar niisháa chichamjai shiir chichartamas anankramawaraín̄ tusan nuna tájarme. ⁵Wi nuí atumjai pujachkuncha nuí pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna ísnaka shiir enentáimjai. ⁶⁻⁷Nu asantai átum ii Uuntri Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Nijjiaí tsanin̄krum ashí túratarum. Nu túrakrum Nii enentáimtakrum tuke tsakaki wétarume. Tura te tariara wajasrum Yusjai kanakchattarme. Yus-Chicham núnisan̄ etsernakmatai nekarmarme. Tuma asarum Yus tuke yuminsarum, núnisan̄ péñker wekasatarum.

Krístujai yamaram iwiaakma takakji

⁸Aneartarum atumsha. Shuar aentsti enentáimmiajain̄ ashí ju nunkanmayan enentáimprar tura Krístun enentáimtutsuk niisháa chichaman áujtamainiak nekaschajai anankramataj tusa wakerutmainiawai.

⁹Krístunam Yus ashí takamtsuk pujuwiti. ¹⁰Túmakui atumsha Krístujai tsanin̄kiu asarum ni iwiaakmarí takamtsuk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti. ¹¹Nu arant átum ayashnium tsupirnatskesha Kristu shuari ajasakrumin ashí ayash wakeramun, tsupirkatniua áintsan̄, Kristu ajapamiayi. ¹²Tura atumsha Yus ni kakarmarijjiaí Kristu jakan iniantkimia nu enentáimtusrum imianmiarme. Túrarum Krístujai métek iwiarnasmarme.

Tura núnisrumek Krístujají métek nantakmiarme. ¹³Nuikkia átumsha tsupirnatsuk atumí tunaarí tuke akui atumí wakaníin jákauyarme. Tura yamaikia Jesukrístujají tsanin̄kiu asakrumin Yuska atumí tunaarí tsan̄kur yamaram iwiaakman suramsaitrume. ¹⁴Tura ashí ii tumashrin̄ sumamtikramatin amia nuna japiruiti. Kristu krúsnum jakamtai ashí akupkamujají sumamtikramamun tsan̄kurtampramijai. ¹⁵Núnisan̄ Kristu krúsnum jaka, iwianchnium ashí akupin ainia nuna nupetak ashí íimiainain̄ iniatsararmiayi.

Nayaimpiniam írunna nu enentáimtustarum

¹⁶Akupkamunmaya Yus an̄kant awajtamsamtai chíkich shuar ame túramujají yajauch enentáimturmarajin̄. Yúamna nujají, úmamna nujají, uwitíncha, nantutíncha, tura tsawantíncha nampermam nujají chíkich shuar yajauch áujmatramkuisha ¿warí urukatin̄? ¹⁷Nu nampernum Israer-shuar Kristu túrattana nuna nakumainiak túrin ármiai. Tura Kristu taa imia Nin̄ki pujá asamtai nakumkamuka ántrai. ¹⁸Tura shuar “Péejchach ajasam Yus áujtsuk aya Yusa suntarī shiir awajsatniuiti” túramkuin̄kia anturkairap. Nu shuar mesekranam wáinkiamun áujmatenak ántar nan̄kaamantu enentáimtumainiawai. Aya aentsti enentáimian chichainiawai. ¹⁹Tuma ásar Krístujají tsanin̄kiar wekainiatsui. Kristu ashí akupin asa ni shuarin̄ Yúsnan jintintíá shiir tsakarat tusa péñker wáiniui. Nu arantcha ashí ápateak Yus wakerana áintsan̄ chikichik awajeawai.

²⁰Atumsha Krístujají jaka asarum aya aentsti enentáimtai ikiukniuitrume. Nuikia ¿urukamtai ju nun̄kanmaya ana nu tuke páchiarum? Nii tuinia nu umirkashtiniaiti. ²¹“Ju antin̄chatniuiti, tuiniawai. Ju yúashtiniaiti. Tura ju achikchatniuiti” tuiniawai. ²²Nusha ¿warí, takasam amuukashtatuak? Kame áyatik aents akupkamu áiniawai. ²³Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3 ¹Nuikia Krístujají nantakin asarum nayaimpinmaya írunna nu wakeruktarum. Nují Kristu pujawai Yusa untsuurín̄i. ²Ju nun̄kanam ana nu enentáimtsuk aya nayaimpinmaya ana nu enentáimtustarum. ³Atumsha Krístujají tsanin̄krum jakamarme. Tuma asarum Krístujají tsanin̄krum Yusjají iwiaaku pujarme. ⁴Krístukete ii iwiaakmarí. Nii nayaimpinmaya wantinkuisha atumsha Nijjají métek wantinkiattarme. Tura Nijjají métek ti pen̄ker átatrume.

Yaunchu iwiaakmasha tura yamaram iwiaakmasha

⁵Tuma asamtai ju nun̄kanmaya ana nu ajakratniua áintsarum iniaisatarum. Tsanirmatniusha, tunáa wakeruktin̄cha, tura takakna

nujaj nankaamas wakeruktincha ántar-yus tikishmatratniua áintsan asamtai iniaisatarum. ⁶Shuar Yúsan umirtsuk aya nuna túrin ásarमतai Yus nin kakerak ti asutiáttawai. ⁷Atumsha núnisrumek túriniuyarme. ⁸Tura yamaikia júsha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. ⁹Yus-shuar ajasrum yaunchu enentáimtairam iniaisamarme. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. ¹⁰Yaunchu enentai, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Nijijaj métek shiir atí tusa. Túramtai Yus ti penker nekaki wéaji. ¹¹Kristuka ashí írúnna nujaj nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarín ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

¹²Yus atumin anenmak Niiniu arti tusa achirmakmarme. Túrutma asamtai jujaj shiir iwiarmampratniua áintsarum tuke túrin atarum: waitnenkartin, shiir awajkartin, péjchach átin, émtin áchatin, tura katsuntin átin. ¹³Kristu atumí tunaarín tsankuramia núnisrumek nuamtak tsankúrnáiratarum. Chíkich yajauch awajtamkuisha shiir katsuntram yapajniaitsuk tsankúrnáiratarum. ¹⁴Tura ashí nankaamas anenaitiarum. Túrakrumka chikichik ajasrum mash pénger túrattarme. ¹⁵Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiiri atumí enentáin pujurtamsati. Nujaj Yus yuminsatarum.

¹⁶Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárum tuke enentáijjaj Yus yuminsarum shiir awajsatarum. ¹⁷Tura takaakmesha, chichaakmesha, kame ashí túramna nuka Jesukristu shiir awajsataj tusam ni kakarmarijjajin túrata. Túrakum Krístujaj Yus Apa yuminsata.

Yus-shuar túratniua nu

¹⁸Nuwatiram, atumí aishri umirkatarum Uunt Yus nuna wakerakui. ¹⁹Áishmantiram, atumí nuwé aneatarum. Atumí nuwejaj kajernaikiairap. ²⁰Uchitiram, ame apa nukusha tuke umirkatarum. Nu túrakrum Yus shiir enentáimtikstarme. ²¹Uchirtintiram, atumí uchiri ti kakantrairap. Ti kakanteamka uchisha ti kuntuts pujus pénger wekasatniun nakitchanpiash. Nu túrunawajin tusarum ántrarum atumí

uchiri kakantrairap. ²²Takarniutiram, atumí uuntri shiir umirkatarum. Ju nunkanmaya uuntri ain aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke penker takastiniaitrume. ²³Ashí túramna nu asump enentáijiai takakmasta. Aya aentsuk yáintinia áintsachu antsu nayaimpinmaya Úuntrum yayá áitkiasrum takastarum. ²⁴Ame Úuntrum Kristu asa nayaimpiniam ashí shiir takustinian tsankatramkattawai. ²⁵Antsu tunáa túrin ni yajauch túramujai métek akinkiáttawai. Yus ashí áentsun métek iyawai.

4 ¹Úunttirmesha, atumí Uuntri atumin wániuk nayaimpiniam pujatsuk. Tuma asamtai atumí yainma jiatsuk penker iniartiniaitrume.

²Yus áujkuram Nii yuminsarum asummiarum iniaitsuk áujsatarum. ³Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir ankant etserkat tusarum áujtursatarum. ⁴Tura wi paant etserkatniuitiaj núnisan etserkat tusarum áujtursatarum.

⁵Yus-shuarchajai shiir túratarum Yus-Chichaman yajauch enentáimturarain. Kakaram ajasrum tsawant ánrarum iniankasairap. ⁶Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujaktin nekaattarme.

Amikmaamu

⁷Ii aneamu yachi Tíkikiu ashí wínian ujatmaktatrume. Niisha wijiai métek Yúsnan pimpitsuk ti penker takasuiti. ⁸Nu asamtai ii juí pujajnia nuna ujatmak ikiantamprarat tusan akuptajrume. ⁹Núnisan ii aneamu yachi Unisemu nijjiai winiawai. Niisha atum wéeaiti, tura Yusjai shiir wekaawai. Nu shuar ashí juí túrunamun ujatmaktatrume.

¹⁰Aristarku wi sepunam tsaniñkia pujamur amikmaatmarme. Núnisan Markus, Pirnapí kaná yachia nu, amikmaatmawai. Niisha nui jeamtai antukmarum núnisrum penker wáinkiatarum. ¹¹Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayamtikruiniawai. ¹²Épaprassha, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusjai kakaarum tuke shiir Yus wakera nu túrak tusa seatramprume. ¹³Wisha Épapras atumin ti enentáimturman nékajai. Núnisan Rautiséanmaya shuarnasha tura Iarapurisnumia shuarnasha ti páchiniawai. ¹⁴Rukas, aneamu tsuákratin, núnisan Témassha amikmaatmarme.

¹⁵Tura Rautiséanam pujuinia nú Yus-shuarsha amikmaatruatarum. Núnisan Nímpiassha tura ni jeen irunainia nú Yus-shuarsha amikmaatruatarum. ¹⁶Átum ju papí áujsarum umikrum Rautiséanmasha nuyá Yus-shuar áujsarti tusarum akupkatarum. Tura atumsha núnisan

Rautiséanmayá papí támatai atumsha áuksatarum. ¹⁷Tura ju Arkipiu titiarum: “Ii Uuntri Jesus ni takatrín suramsa nu péñker umikta” tawai, titiarum.

¹⁸Wi, Papru, winia uwejrújai júchiniak áatkun amikmaajrume. Sepunam pujajna ju enentáimturatarum. Yus shiir yainmakarti. Nuke atí.